

荀
河
文
集

筭河文集目錄

卷一

請正經文勒石大學以同文治摺子

遵

旨覽奏訪求遺書摺子

謹陳管見開館校書摺子

購獻遺書摺子

請馳封庶祖母李摺子

恭謝馳封摺子

恭進

南巡詩冊摺子

平定兩金川大功告成紀實

恭慶

聖母崇慶慈宣康惠敦和裕壽純禧恭懿

皇太后七十萬壽文 謹序

卷二

聖謨廣運平定準噶爾恭紀四言詩百韻 謹序

聖駕南巡典禮慶成恭紀柏梁體詩百韻 謹序

南巡賦 代劉文正公作

聖謨廣運平定準噶爾賦

聖駕闕河賦 代作

卷三

哨鹿賦

後哨鹿賦

擬平金川頌 并序

平西頌 謹序

聖駕西巡奉

皇太后幸五臺山頌 謹序 代作

恭擬

東巡大禮頌 謹序

恭擬

東詣南巡頌

謹序

卷四

文鳥來巢賦

有敘

筆賦

別賦

擬招隱士

泛舟賦

并序

金魚池賦

并序

卷五

說文解字序

亳州志序

曲阜顏氏弄藏尺牘序

安徽試卷序

勸學編序

林青圃先生集序

陳涵一詩序

杭州黃氏譜序

椒花吟舫小集序

草橋修禊序

送蔡生必昌之官屯留序

送陳秋士歸武進序

卷六

漢西嶽華山廟碑跋尾

書居攝壇二刻石後

漢三公山立壇刊石文跋尾

焦山無專鼎跋尾

讀揚雄箴書後

蘇州張氏廣韻刊本書後

竹垞先生日下舊聞書後

明朱謀埠校刻水經注書後

戴氏校訂水經注書後

唐彭澆權殯誌銘跋尾

宋李宋篆刻昌黎先生箴跋尾

東坡先生壬寅重九詩石跋尾

董文敏公御書樓記跋尾

雅宜山人借券跋尾

聖教序記跋尾

題香樹先生書卷尾

陳未齋先生臨李北海書跋尾

書陳仲思所贈書後

徐鄰哉書跋尾

程葺翁畫冊跋尾

卷七

和州梅豪亭記

并銘

進襪亭記

遊采石記

遊青山記

遊玉華洞記

三百三十有三士亭記

觀順天府署諸碑記

桂馥說文統系圖記

莫氏詒穀堂記

并詩

黃進士本田蓼菽圖記

靈璧徐薛君百歲畫像記

并讚

容圃記

嘉樹屋題記

卷八

與賈雲臣論史記書

答友人問唐魏鄭公書

與知池州府張君士範書

同姓中黃先生之官蕭山教諭乞訪問先世譜牒

爲書數則

福建鰲峯書院入祀林沈朱張四先生議

大宗問代立後議

族祖兩溪先生以下三世像贊

諸伯粹先生先生像贊

諱宗張

閔貞所畫麻姑圖贊

研銘二十六首

石銘二首

杖銘

柏尺銘二首

玉刀銘

玉螭銘

卷九

先府君行述

先兄仲君行狀

庚午科舉人呂君行狀

王母高太夫人行狀

劉鼎燹先生行狀

衢州府知府穆菴林君行狀

卷十

重刻興復潭柘古刹十方常住碑記

重刻明謝文正潭柘寺碑記

山右三忠祠碑記

有詩

釐正詩話樓祀位碑記

移唐林夫人元鄭居士二誌石于福州鄉賢祠記

洪烈婦祠碑記

有詞

和州二薛孝子附祠碑記

改葬故選李公墓記

麻城梁君客葬墓碑記 有銘

廣濟閔氏先墓碑

書閔氏墓碑後

卷十一

邵念魯先生墓表

婺源縣學生汪先生墓表 并銘

贈儒林郎翰林院檢討曹先生墓表

穎上王貞烈女墓表

奉政大夫吏部驗封司郎中偃師武君神道碑銘

卷十二

朱梅厓先生墓誌銘

編修林君墓誌銘

婺源余生墓誌銘

浙江提刑按察使司副使分巡溫處道芮君墓碣

銘

外王舅王北臺先生墓誌銘

外舅王舜夫先生墓誌銘

編修蔣君墓誌銘

西城兵馬司副指揮使張君墓碣銘

卷十三

博平縣知縣朱正甫先生墓碣銘

河南道監察御史胡君墓誌銘

誥封奉直大夫刑部貴州司主事祝君墓誌銘

贈儒林郎翰林院編修鄒慎堂先生墓誌銘

封光祿寺署正候選州同知王君墓誌銘

先兄仲君墓誌銘

從子錫秬暨婦裴合葬墓碣銘

國子監生范君墓碣銘

封奉直大夫禮部儀制司主事史先生墓誌銘

史先生墓碣銘

卷十四

國子監生洪君權厝碣銘

汀州府同知吳君墓誌銘

處士安州張君墓碣銘

安平縣知縣郭君墓誌銘

邵武縣學生朱君墓誌銘

附貢生楊君墓誌銘

楊孺人墓誌銘

葛太宜人墓碣銘

李恭人墓碣銘

陳安人墓誌銘

黃孺人墓誌銘

范安人墓碣銘

何君側室袁氏墓石文

卷十五

蔣秋涇先生別傳

錢塘吳氏家傳

蕭山王君家傳

紀張孝子事畧

書欽程密事

書蕭山汪氏二節婦事

少婦周紀事

張烈婦紀事

書羅烈婦事

書烈婦景事

書趙有慶側室王氏事

書吳節婦事

吳彙潭先生哀辭

并序

雷祖劍進士哀辭

并序

烈婦史氏哀辭

并序

貞烈張偶姐哀辭 并序

卷十六

祭興縣孫文定公文

又祭孫文定公文

祭海寧陳文勤公文

祭子告禮部尙書陳公文

祭汪文端公文

祭錢文端公文

祭王文莊公文

祭蔣文恪公文

祭錢公文

祭莊公文

祭周先生 全錫文

祭外王姑解太夫人文

祭外姑王母高太夫人文

祭茶陵彭母譚太夫人文

祭章學誠之母史孺人文

祭朱太宜人文

祭同年錢萬言婦張安人文

祭王太宜人文

目錄終

敘錄

錫庚編纂先大夫集既成謹敘於後矣惟懼編次失序或從而非議之者更爲敘錄以明之昔班氏藝文志區六藝爲九於是詩賦別爲一種斯後世文集之權與第議奏附於禮經論斷入於春秋家言當時尙未有經史之分烏覩所謂文集哉班氏以降東漢陳晉宋諸史書於文人傳中敘其傳著第曰詩賦碑箴頌誄若干篇而不云文集若干卷蓋古人之文散著篇籍固不必強以類從也晉摯虞文章流別不傳傳於今者莫先於梁昭明文選第總集之類例與專集之成一家言者既有不

同姑就其所分之類例論之固已未能盡善前賢已有

議及者

如賦爲古詩之流離騷亦賦也別賦與騷爲二枚乘七發皆設問也而別爲七之名然則九辯

九歎可別爲九乎難蜀父老亦設問也而別爲難體然則客難而外解朝別爲嘲體賓戲別爲戲體可乎漢武詔策賢良卽策問也以其出於帝制遂於策問之外別名曰詔班固述傳卽史遷之自序也乃於史論之外別出一體曰史述贊若夫封禪典引美新皆頌也因稱符命以述功德而別其體爲符命魏文典論亦猶桓子新論王充論衡以論名書耳乃與六代辨亡諸篇同次於論凡此之類未可殫詰

後之專集自爲

類例各有短長李翱次昌黎文集於不可分類之中或

曰雜著或曰雜文似爲近之然亦未可盡取爲則也蓋

一人之文各有專長固不必強爲區分類別諸體畢備

爲工卽若詞章之家詩賦居先經術之士長於考辨史

家者流長於論斷後之編次其文者當知其所專屬循
其詣趣庶得旨歸

近集有長於敘事之文者以碑表誌狀居首亦其例也

今錫庚

是編不敢強分類列其後先之次以意相從雖未合乎
時趣實無乖於義理唐宋以來奏疏代制各有專集今
以奏摺冠於編首而進呈賦頌歌章次之總成三卷不
歌而誦謂之賦感物造端於文爲近今以賦騷諸篇別
爲一卷次於下著述之旨彰往考來溯厥本源莫重於
序故以冠考證諸篇之首其贈言亦附之書後跋尾多
所論訂故次於序記所以述往古之遺載一時之蹟也
書所以商榷古今辨論異同也故又次之其餘議讚箴

銘篇幅無多槩曰雜著附於後總四卷爲上編敘事之

文所以備史官采擇故首列行述行狀

中有先府君行狀先仲兄行狀

尤關傳之久遠莫宜於金石故次之以碑記次墓碑墓

表

中有邵汪兩先生墓碑皆本朝碩儒

次神道碑次墓誌墓碣至於別

傳家傳亦闡幽之文也故附於後而以紀事書事次之

哀詞有序亦紀事之文也祭文述事亦哀詞之類也故

又次之總八卷爲下編此編纂先大夫文集之大畧也

謹敘錄如右

笥河文集卷一

大興 朱筠 竹君

請正經文勒石太學以同文治摺子

奏爲請正經文勒石太學以同文治事

臣 蒙被

殊恩備員詞館出任學臣伏念安徽大省務思仰副我
皇上以實學訓迪多士至意校藝之餘輒舉

御纂

欽定諸經及康熙字典與之講習諸生亦頗蒸蒸嚮風
第其中詞彩可觀而樸學未盡每閱數卷俗體別
字觸目皆是其尤甚者瑕瑕不分諂諂莫辨據旁

著處適內加商良由經訓之未深以致字體之罔
定江南且然何況小省其何以識字通經由鄉會
兩試進應

殿廷之對乎

臣

竊惟書契之作聖人所以治百官而

察萬民周禮漢律童子試誦職在小學漢嘉平中
詔蔡邕等書石經立太學門外觀視筆寫至於填
塞街陌傳爲盛事晉唐以後代有石經而開成之
刻現存陝西窮經之士奉爲依據然則欲多士字
體之正非本經文以示之準或不可缺我

皇上稽古右文超越往代

武英頒刻嘉惠士林無不詳具惟上庠之書未刻於

石臣愚以爲

聖人文德武功美備之後必將著金積鏤玉版用式於
典謨以一同文之治矧六籍所垂學官弟子朝夕
誦法者敢請

勅下儒臣取十三經正文依漢許慎說文梁顧野王玉
篇唐陸德明釋文校定點畫選擇翰林中書之工
書者以清漢二體書書之摹勒上石刊於國子監
之壁永永昭示萬世行見多士益將踴躍於變于
文思之化鴻都之書不足道也臣知識短淺是否可採

伏冀

皇上睿鑒施行謹

奏

遵

旨覆奏訪求遺書摺子

奏爲遵

旨覆奏事本年十一月十六日準安徽撫臣裴宗錫札

會承准大學士劉統勳字寄奉

上諭飭催訪求遺書先行據實覆奏通諭督撫學政等

因欽此仰見我

皇上念典稽古之至意臣職在文學自去冬抵任以來

卽準部劄接奉

諭旨留心購訪及臣按試各屬一縣一州隨處諮詢並

飭學官諸生各舉聞見所及無論刻本抄本取送
校閱其陸續賫到及訪聞現有其書可采錄者若
安慶則有方以智通雅方中德古事比方中履古
今釋疑徽州則有江永禮經綱目周禮疑義戴震
考工記圖屈原賦注寧國則有梅鼎祚算學全書
戴國章愚山集吳肅公術南集及闡義太平則有
徐文靖竹書統籤山河兩戒考鳳陽則有曹楷閩

子年譜潁州則有劉體仁集六安則有連斗山周
易辨晝廬州則有合肥縣知縣張佩芳陸贊奏議
纂注諸書並皆潛心服古說有依據足成一家之
言可備甄擇其餘前代故書尙俟漸次網羅以期
充備其如何辦立章程開局彙校一面與撫臣札
商務期搜訪無遺編次有法足資

虞益仰答

勤求侯卷帙稍充目錄謹輯再行彙

奏恭呈

乞覽茲將現在辦理梗概先行覆

奏伏祈

睿鑒謹

奏

謹陳管見開館校書摺子

奏爲謹陳管見仰祈

睿鑒事竊惟載籍重於左史目錄著於歷代典至鉅也
制至詳也我

皇上念典勤求訪求遺書不憚再三凡在鼓篋懷槩之

倫莫不蒸蒸然思奮勉獻一得列臣蒙

恩職廁文學敢竭聞見知識一二爲我

皇上陳之

一舊本抄本尤當急搜也漢唐遺書存者希矣而遼宋金元之經注文集藏書之家尙多有之顧無刻本流布日少其他九流百家子餘史別注往卷帙不過一二卷而其書最精是宜首先購取官抄其副給還原書用廣前史藝文之闕以備我

朝儲書之全則著述有所原本矣

一

中秘書籍當標舉現有者以補其餘也

臣

伏思

西清東閣所藏無所不備第漢臣劉向校書之例外
書既可以廣中書而中書亦用以校外書請先
定

中書目錄宣示外廷然後令各舉所未備者以獻則

藏弃日益廣矣臣在翰林常繙閱前明永樂大

典其書編次少倫或分割諸書以從其類然古

書之全而世不恒觀者輒具在焉臣請

勅擇取其中古書完者若干部分別繕寫各自爲書以
備著錄書亡復存藝林幸甚

一著錄校讐當並重也前代校書之官如漢之白

虎觀天祿閣集諸儒校論異同及殺青唐宋集
賢校理官選其人以是劉向劉知幾曾鞏等並
著專門之業歷代若七畧集賢書目崇文總目
其書具有師法臣請

皇上詔下儒臣分任校書之選或依七畧或準四部每
一書上必校其得失撮舉大旨敘於本書首卷
並以進

呈恭俟

乙夜之披覽臣伏查

武英殿原設總裁纂修校對諸員卽擇其猶專長者

俾充斯選則日有課月有程而著錄集事矣
一金石之刻圖譜之學在所必錄也宋臣鄭樵以
前代著錄陋闕特作二畧以補其失歐陽修趙
明誠則錄金石聶崇義呂大臨則錄圖譜並爲
考古者所依據請

特命於收書之外兼收圖譜一門而凡直省所存鐘銘
碑刻悉宜拓取一併彙送校錄良便

臣 檇昧之見是否可採伏冀

皇上睿鑒施行謹

奏

購獻遺書摺子

奏為購獻遺書事臣前奉

諭旨求書曾據臣按試安徽所屬聞見著錄十餘種

先行奏明在案續經撫臣裴宗錫彙列臣銜開奏

所購八十二種俱就各府縣所呈送本省近人撰

著臣現在復札商撫臣設法購訪古本舊書務期

該備又面諭諸生令其轉相咨問果有佳本徑送

學政開局錄寫給還原書庶以仰答

聖人念典勤求之至意江南人士應令欣然頗有呈送

畧可觀採者臣於歲試訖暨旋太平稍為檢校次

第如此辦理自較便易卽臣行篋所攜舊書外間
頗稀者如唐開元禮許嵩建康實錄韓愈集五百
家注宋中興館閣續錄洪适隸釋張敦頤六朝事
迹元蘇天爵名臣事實張鉉金陵新志宋范祖禹
太史集郭祥正青山續集金趙秉文淦水集元耶
律楚材湛然居士集等書十餘種悉付繕寫彙入
安徽所購書內一併進

呈又臣自幼授書籍隸

輦下歲時喜購舊刻逸編積之三十年家中間有善
本恭逢我

皇上求書盛典亦願以蠶酌管輝上資海日臣自奉

命來南家中故籍現囑臣門人吏部主事程晉芳禮部

主事史積容兩家收貯臣程晉芳現在四庫全書

館與充纂校之事臣謹卽記憶所有經史之外宋

元集部畧多凡得四十餘種開單呈

覽伏祈

皇上可否卽以臣所開單付館令臣程晉芳等檢取校

錄其可用者附入全書繕錄進

呈俾陳冊幽光彰發軒露臣所抱獻與有榮施至其

錄訖原本及無用者仍發交程晉芳等領收臣謹

據所知所見不敢自秘據實入奏伏祈
睿鑒無任悚惶之至謹

奏

請馳封庶祖母李摺子

奏爲敬抒下悃仰懇

聖恩馳封事乾隆三十六年十一月二十五日恭逢

聖母皇太后八旬萬壽

皇上廣沛

覃恩臣以四品例得

封父母及本身妻室但念臣祖及父已蒙

殊恩以

臣弟珪

現官山西布政使司選

封二品

臣

所應得

封典例不重加竊

臣

有庶祖母李氏逮事

臣

祖父生子

早殤厥後佐

臣

祖母馮撫

臣

父有恩及

臣

母徐多

病下世

臣

時年十五

臣弟珪

年十三

並撫育於庶

祖母李朝夕鞠養克有成立

臣

庶祖母李八十有

六以乾隆二十五年物故

臣

等撫育私恩未有以

報恭惟我

皇上錫類推仁

恩周燾覆懇祈

聖慈俯准以臣本身及妻室應得

封典貽封臣庶祖母李不特臣獲遂私忱卽子子孫孫

永戴

高厚之恩於無旣矣不勝悚切待

命之至謹

奏

恭謝貽封摺子

奏爲恭謝

天恩事竊臣於七月十三日拜摺奏請以臣本身及妻

室

封典 賜封 臣 庶祖母李八月二十七日奉到

硃批有旨諭部九月十六日承准吏部札覆到 臣 接奉

上諭 云 欽此 臣 隨即恭設香案叩頭祇謝訖伏念 臣

祖父世受

國恩兄弟官借朝列 臣 弟珪 既獲以二品賜封曾祖父

母 臣 茲復得請賜封及庶祖母一門三世

渥澤疊施

龍錫載膺榮過樂城之贈果烏私曲遂感深令伯之報

劉莫罄名言惟知頂戴所有感激微忱理合具摺

恭謝

天恩謹

奏

恭進

南巡詩冊摺子

奏爲仰祈

睿鑒事竊

臣

執筆詞垣校文閩海欽惟我

皇上運周天健德懋日升恭逢

七旬萬壽之年欣瞻

五舉南巡之典

禮文豐鉅

恩澤涵濡徧江浙而歌臺萊盡溝洫以

觀河海茨階旣侔於堯德山川永奠夫禹功

壽域咸遊

日光莫繪

小臣

跂想

屬車之盛匪勉鍊京之思一體柏梁二分毛傳廟堂

奏

御千篇慙後於馬卿經術立言六藝願依乎韓氏伏祈

睿訓謹獻卮詞

臣謹

奏

平定兩金川大功告成紀實

乾隆四十有一年春二月

皇帝再平兩金川金川僻在西南其名不聞於古在漢
再驪唐維州絕徼之外隋嘗以金川名縣而唐縣
之屬維州者近之宋世金川之獠與邊吏接兵其
事不著正史明代隸雜谷安撫司與董卜韓胡同
族

國初順治中沃日歸誠康熙六十年土舍色勒奔初
內嚮實受印信爲我外臣其地南踰蜀徼西連危
藏所在危藏者禹貢所稱南海三危地也而金沙
諸江之源往往濫觴其間於是有金川之名又西

番語大川曰促浸小川曰趨拉於是行兩金川之名其中純山少平地瀘水奔流其中太古壘石飛雪不消箐林蒙樹尺寸踏躡無路其人漆跣能自下上若鳥跡獸蹠然越在荒服不隸於邊羈縻勿絕而已十三年狼卡首禍繫趨拉土司澤旺以抗

命

命大學士傅恒往經畧諸軍至軍先召其黨良爾吉阿扣斬之狼卡懼時提督岳鍾琪獨身入噶喇依宜

諭

威德狼卡乞降

皇帝赦之不殺俾守其土司如故而歸澤旺於趙拉故地然促浸白特所處遠險外隔美諾中有勒烏圍噶喇依之重障意中國師不能度巘輕入而其兵力在九土司中號最強用敢不靖薦食鄰部二十三年促浸以兵逐革布什咱土司索諾木多布丹及趙拉土司之子僧格桑於吉地官寨四川總督開泰檄調綽斯甲布兵斷其糧路又令章谷土司助趙拉攻之而遁時以番部互讐殺不足誅

詔九土司併力分戰促浸以番攻番可毋勞中國師久之促浸據丹霸之沒亦金岡二十七年秋七月侵

緯斯甲布之甲角俄坡地九月與從噶克校磨卓
克采革布什咱三土司戰冬十月兵擾巴旺之隔
河瓦素地二十九年潛兵赴趨拉緯斯甲布所在
劫掠三十年再襲緯斯甲布與鄂克什構兵不休
三十一年秋九月狼卡來言乞

頒前所請印信冬十月總督阿爾泰等赴康八連狼
卡迎於道側願悉反諸土司侵地以其女嫁趨拉
土司之子僧格桑三十五年趨拉遂侵鄂克什地
據之明正木坪兩土司請往諭趨拉不從則擊之
秋八月阿爾泰等赴連圍僧格桑來稱其父澤旺

老病且言鄂克什部誣其父子故搆毀今願罷兵
歸其地與所掠人許之於是促浸趨拉益橫無所
忌且其俗僞傳有殺至維州橋之謠兩部輒妄相
詭以爲狼狽相依雖中國莫如予何三十六年夏
四月促浸土司狼卡之子索諾木以計蠱革布什
咱部頭人戕其土司索諾木多布丹併竊其妻阿
爾泰等以兵往責問索諾木倔彊不聽命且攻鄂
克什部六月促浸索諾木趨拉僧格桑兩酋陰相
搆煽期日發兵分侵明正土司界以叛秋七月

詔總督阿爾泰等分路討叛者冬十月克復明正侵地

十一月阿爾泰罷

命大學士溫福自巴朗拉總督桂林自約咱進剿十二月並克之三十七年春三月桂林遣軍收復革布什咱故地溫福克資哩尋罷桂林

命阿桂爲叅贊大臣赴南路冬十一月阿桂攻克翁古爾壘十二月克僧格宗遂克美諾溫福攻克布朗郭宗底木達執土司澤旺以來趨拉悉平而僧格桑自美卧溝遁走促浸乞援於索諾木兩軍旣會乃

命溫福爲定邊將軍阿桂副之溫福自功噶爾拉阿桂

自當噶爾拉進討促浸三十八年春溫福移軍於
木果木克昔嶺夏六月索諾木旣得僧格桑留不
遣而遣其頭人七圖安賅爾歸師與之偕間道趨
美諾號其故番之降我者厥衆蠡起蔽木果木山
背而上以搯我軍溫福遇害

皇帝赫然震怒

命磔澤旺於市秋七月阿桂在當噶爾拉聞木果木變
爰自南路全師而出

皇帝按圖山川阨隘以軍事問阿桂阿桂具言賊么磨
耳然據地險誠不易攻臣奉

天子之威靈將士勦力多算者勝賊必可滅也於是授
阿桂定西將軍印豐昇額明亮並爲副將軍富德
爲叅贊大臣調滿洲健銳火器營索倫諸軍赴軍
冬十一月阿桂克資哩攻阿喀木雅美美卡木闌
壩悉復之明亮自南路克赤丹思

上以半歲所克旋失之地復於兩日旣

嘉兩路將軍奏克之捷特以伯益之稱滿招損謙受益
者訓之於是阿桂又克喀頂宗明郭宗再取美諾
收復趙拉全部明亮又克僧格宗阿桂又收復底
木達布朗郭宗會頭溝所在三十九年春正月甲

子明亮克馬尼山前之拉窠克石用地雷碎其礮
壓賊死大半富德繞出山後克其丫口合爲一奪
取絨布寨癸酉明亮克木谿庚辰巴圖魯興善保
仰攻陟其山顛有賊數十人橫峯出舉鎗擬我其
火不然我軍揮刀縱火而前山嘴列礮遭火自裂
我軍之氣百倍進克其卡卡角卡卡角山半石隙
一線可通馬爾邦土人云是爲促浸南路第一隘
皇帝聞之曰

上蒼之佑我軍也是時豐昇額舒常攻宜喜未下與絨布
寨軍並阻險止兩軍與將軍軍出三路三月丙子

阿桂克羅博瓦山梁賊轉礮下擊我軍傷者不動
伺賊偪發礮中賊立斃夏六月克色溯普色溯普
山梁中三大礮兩坡礮左一右二狀蛇之應會甲
午夜兩霽月落先伏索倫軍於山兩隘將軍率敢
死士銜枚直上破二石卡賊大駭合鬪戰酣則開
一角縱之賊走隘遇伏彊騎射之殪須臾諸礮盡
下色溯普羅博瓦兩地並堅礮賊以死守我軍先
後殲之直臨遜克爾宗自用兵以來此二戰殺賊
爲最

上諭將軍曰朕好生不忍多殺其明告以棄逆來順者

賁之於是賊大創其拒我益無罅河桂遣謀偵賊
守懈所謀言喇穆喇穆崖斗峯盪不我虞也則麾
師踰隘溜薛蟄息猿引而上並攻日則丫口下之
時南路頓宜喜久明亮尙軍絨布寨乃

詔豐昇額赴西路與將軍軍會令明亮分兵七千助舒
常進攻明亮以不得賊要領亦欲西會綽斯甲布
土司請爲前驅明亮乃冒甚雨走宜喜山梁出不
意克之迷克達爾圖九月促浸師遁獲趙拉頭人
七圖安睹爾等僧格桑妾側累亦降悉械以至

詔詰促浸令出僧格桑促浸言已死獻其顱骨側累識

之齒鬪有鬻冬十月阿桂克默格爾阻雨於康薩
爾山下四十年春正月庚申雨止夜潛師拔鹿角
超重濠據其山顛復雨雪師不進夏四月辛卯攻
木思工噶克其丫口木思工噶與式梯爲賊部呼
噶要害自康薩爾至丫口我以銳師破其連柵排
礮沁河所向掃賊無遺阿桂奏

上具言臣此役一日而收三年未竟之功矣初明亮
以賊掘斷達爾圖路不得前阿桂乃檄福康安將
千人助明亮攻甲索海蘭察亦往會攻克撒撒谷
而和隆武亦攻克日勞和隆武故將軍和起子也

勇冠軍明亮令曰丁酉且畢攻和隆武先夜半與所部趨上日旁山後突入賊碉賊積鎗石不及發而克於是達爾圖之得楞所在輒下明亮軍旣得日旁與阿桂所攻之日爾八當噶隔一河耳於是阿桂遣舟渡福康安諸軍並攻山溝之斯年木咱諸寨克之兩路軍合乙巳阿桂克式梯明亮克茹寨收其麥田五月甲寅阿桂攻獲噶爾丹寺及噶朗噶諸寨噶朗噶者促浸一大聚落也而噶爾丹寺賊中相指語曰名刹我軍得之居旣高勢傾賊穴而遜克爾宗當我軍之後阿桂計必先取之於

定分三路旋攻豐昇額先大軍登梯牆毀寨而入
殲賊於礪中自是我軍直前不顧秋七月明亮夜
運礮石真噶下喧譁以亂軍聲師進拔之戊申阿
桂攻巴占計欲取拉枯喇嘛寺而昆色爾喇嘛寺
更踞其上山立如柱蟻緣乃可升卽緣而升莫防
其後於是紆軍舍圍枉下溝中斷岩洞賊來襲我
令秦斐英阿直搏昆色爾人人履頂而上竟克其
寺海蘭察亦攻克果克多山峯進圍拉枯喇嘛寺
躡之常保祿亦攻舊則大海顏其厚垣辛亥阿桂
克章噶寨章噶寨斗立拉枯喇嘛寺下賊於礪外

鑿溝取敗葉朽株布匝溝上薄土覆之鎗眼隱溝
旁溝外立柵以誘攻者我軍覺之斫柵橫溝乘之
以登且登且斫輒據其兩山峯其日明亮白石兵
嚙下壓克噶西喇嘛寺丁巳又下壓克沙爾尼溝
所在焚其溝南與將軍隔河而軍戊午阿桂軍繞
巴占八九峯後攻獲冷角喇嘛寺進逼勒烏圍官
寨戊辰富德遣軍掘地道成當噶咱普山腿河灘
之間河南軍五隊河北軍五隊庚午自下施火線
火從山腿轟裂而上木城石卡當之礮下賊守者
飛屍空中雨鮮而墮舒常阿蘭泰等橫撲山腿瞭

懸崖折上取其木城癸酉阿桂并日夜攻轉經樓
轉經樓與勒烏圍大礮相犄角中間間以層礮高
礮五重疊山而上阿桂以一軍斷中間使賊不得
相援一軍泐冷角寺並河之西北而南截賊走水
之路賊有橋曰甲爾日礮橋縱橫往來自相救乃
募楚士善泐者繫巨絙於橋柱拽橋圯之又以礮
距賊遠我軍火鎗不及中則令軍捆柴人戴之以
手推沙囊蒲伏行至礮泐積之上覆以木柵三重
俯擊礮下賊無不倒又穴地用礮轟賊之掘溝以
拒我者百策並舉賊大窘感爰以八月庚寅望夜

圍合月山當午燄震鎗發火彈馳翥呼聲與之俱
礮石撼動莎羅奔兄弟及頭人丹巴沃雜爾先竄
我軍拔柵斫圍更戰賊潰死相藉厯亥子丑三刻
及曙辛卯克勒烏圍明亮亦畧琅谷以上焚其克
爾瑪斯當安寨九月甲戌晦阿桂進攻西里冬十
月戊寅明亮自斯當安克什扎古閏十月辛亥攻
琅谷望見我軍之攻克爾噶色札木者悉上山陳
奎林等自溝中出山之顛遂克札烏古山梁阿桂
軍先克西里之黃草坪乙卯分兵三路仰攻檄福
康安等繞出木城背下壓賊軍丁巳築墩臺二擊

賊戊午夜烏什哈達等衝而上掣木城十四克西里山其日富德夜克布咱爾尼山梁十一月甲戌朔阿桂攻西里第二峯曰奔布魯木我軍乘夜冒鎗礮而登亂擲火彈大風助之木城焚海蘭察乘火直取奔布魯木小峯後隊自上壓其西里正寨克之庚辰明亮自甲索至日斯滿又至札烏古木並河悉下遂據蹶占十二月戊申阿桂軍亦並河攻薩爾歪寨進偏科布曲索隆古下令達色等攻其左烏什哈達等攻其右海蘭察等自上下攻又檄福康安等通河奪賊寨四面軍集薩爾歪下立

克之甲子明亮克山梁三丙寅阿桂奏克格隱古
科布曲索隆古所在山梁

上諭曰索隆古距賊巢不遠自此尅期平賊矣庚午阿
桂白索隆古進師據則朗丫口明亮克獨古木鑿
通乃當山梁壬申晦克甲雜直抵獨松極於河西
四十一年春正月癸酉朔明亮軍克獨松隘口遂
搗馬爾邦與阿桂軍會丁丑明亮軍於巴布朗如
巴布朗如臨河斗險阿桂軍三面圍賊巢其一面
限河至是圍始合富德亦自馬爾邦並河克噶哨
爾如諸寨會軍進剿於是阿桂進克舍齊喇嘛寺

又克雍中喇嘛寺兩寺當賊之吭咽我諸軍拒之
賊成擒矣自克勒烏圍賊部衆雜還來降其頭人
布籠普阿納木達什阿庫魯等相率降至是索諾
木之母阿倉姑阿青悉降諸軍並進合圍令日水
軍緬水陸軍柵陸毋令賊得逸凡四十餘日索諾
木惶懼遣其兄岡達克彭楚克詣營覘我繫之於
是賊技窮不克自死二月丙午索諾木率其兄弟
莎羅奔甲爾瓦沃雜爾斯丹巴及兩土婦頭人丹
巴沃雜爾阿魯木綽窩斯甲尼瑪噶喇克巴並兩
喇嘛醜屬二千餘人出噶喇依寨奉印信跪獻於

軍門生卽俘獲兩金川平乙卯

皇帝方祇謁

兩陵捷奏達於桃花寺

行在

皇帝穆然謂

列祖在天之佑感通不爽也爰封定西將軍阿桂一等誠

謀英勇公副將軍豐昇額以攻遜克爾宗先登加

封果毅繼勇公再賜一等子弟布延達賚襲爵明

亮一等襄勇伯叅贊大臣海蘭察一等超勇侯額

森特一等男領隊大臣奎林本公爵加賜二等男

其子襲爵和隆武以子爵晉三等果勇侯福康安
加封三等男又封大學士軍機大臣于敏中一等
輕車都尉並世襲罔替復

詔圖畫功臣五十人於紫光閣於時奉

皇太后迎

釐於

岱宗

詣魯釋奠

孔子告成於學還

蹕夏四月丙寅獻俘於

廟

社戊辰

皇帝勞師率王公大臣拜

燾於郊勞臺將軍阿桂至泊軍行抱

見禮以寵賚之巳巳

皇帝御午門受俘五月辛未朔

皇帝率羣臣恭加上

皇太后徽號

御殿受賀

詔頒天下慶禮大浹

御製碑文四篇一刻太學一刻美諾一刻勒烏圍一刻

鳴喇依垂示世世臣伏而誦之仰見我

皇上聖德神功天地情載

武烈之盛至於闢地西陲二萬里爲自古所未有然而
金川小醜負險不庭近在四川省外用兵五年平
之

御製碑文歆然比於唐之平淮蔡乃知

聖人不得已而用兵之心雖金川之役視西師大小懸
殊要之我戰則克其理一也黃帝之銘日日中必
夔操刀必割書曰其克詰爾戎兵臣愚以爲平兩

金川其成昭著於將軍以下勦力一心而其實本
於

天子之惟斷乃成與唐臣韓愈所稱編之詩書之策而
無愧者允哉符合臣橐筆翰林竊附斯義具列金
川始末作紀實一篇稽首頓首以

獻

恭慶

聖母崇慶慈宣康惠敦和裕壽純禧恭懿

皇太后七十萬壽文

謹序

惟

天以至孝之德錫我

皇帝奉事

聖母于今五十有一年

皇帝卽位之二十六年

皇太后春秋七十冬十一月恭逢

聖母初生之辰仁壽弗祿靡有涯極惟

皇帝所以承順

聖母德意而廣之天下以上迎

皇天之麻者

天子之孝無以加焉伏卽所見闕陳其大者

皇帝誠敬

圓壇

方澤南北祇事四享一裕格子

太室必

躬必

親風雨順從福應感騁天下咸知

皇帝之德如是而

皇太后每子

宵旰之先雨暘之候

官中步禱響答

元穹爲

皇帝則效此

聖母德之至也

皇帝聰明作民父母

屬車天行申升于嵩東岱西臺南巡乎大江或再而三
歲以秋獮北朝外藩天維地埏仰首而思

天子之幸焉天下咸知

皇帝之澤如是而四巡所至

皇帝必奉

聖母以行

皇太后喜所過賜予以億萬計

慈寧一豫沃膏吹榮咸樂其意此

聖母澤之廣也

皇帝神武者定西陲二萬餘里日入之部天西所極歸

我版圖天下咸知

皇帝之武如是而

天子方以西土告田上佐

玉食所謂以天下養者乎此

聖母之福以成我

皇之大武也

皇帝天文燦然作爲連珠上

聖母壽在昔周且述雅載美文母說者以爲盛哉以聖人
爲之子而歌詠其母后然特臣子之事耳今以
天子而躬修士之孝古未嘗有此

聖母之聖以成我

皇之大文也

皇帝至孝奉養無方晨昏

左右常如一日於時

聖母七旬

皇帝合萬國之懽心爲

皇太后祝釐減趨咸來

皇帝卽宮中爲綵衣之舞奉觴前爲

壽諸王等以次舞酒行歡甚是日四海臣民聞者咸呼

萬歲太和之氣先見休嘉歲旦日月合朔於婺女五緯之

宿相生如珠熒然見於子丑之次是冬

聖母萬壽明日適迎長日之至意者

皇天以是昭美

聖母萬壽無疆之符而用答我

皇帝至孝之意引無極也

臣

謹按傳記有有其應而書

之者矣有有其德無其應而書之者矣未有有其

德與其應而不編之玉簡著之金牘者也今

皇太后有如是之壽而

皇帝躬至孝之德符合于聖典而瑞見乎

皇天

臣

竊以爲漢司馬相如班固唐臣柳宗元並著符命

載之正史其文斐然而實則未至

臣

躬際斯

盛誠歡誠忭輒據經義覃神極思作文一篇命曰元符以發揮我

大清福應之盛原本

至德億萬萬年於是乎始謹頓首以

獻其文曰

遂初之紀元氣昆侖焱焱淵淵羲舒嶽渤天生聖
人粵若青虹絙華胥之洲彤龍嶠常羊之陬大電
穆流以纏黃軒大星駁犖而揭朱宣景僕咤枋乎
瑤光陳豐縣藐於聖跡有唐則奄風三河之觀虞
則大虹重華之覲蕙苾鈎鈐文命之辰白月黑龍
天乙之年莫不推雞儀運龍斗雲翕風布霑霽殿
颺日生聖人肇哉聖母臣愚以爲皇古之跡倣克
偉倘若天地外非耳目所卽不可根據以爲信實
若乃握正義哦雅詩姜嫄生民太任思齊妣嗣以
徽姜盛以才繫成周之聖續載六經而法垂是以

周公歌之孔子筆之神光蔚然傳至今日蓋越三
千八百而景耀軒豁也三五而述漢唐以邇崇誕
日叶慶紀千秋浹魚藻之歡萬歲鋪燕饗之美珠
沼蘭殿褰其徵雲龍羽人躡其兆將以跂夫烝烝
之典雖離之詩羌莫得而緝紹焉洪惟

大清駿命熙祚申錫乎

皇天權輿

帝女朱果是吞實佑啟我

列聖東土之興勃焉暨

文皇后乃以

帝母翊我

世祖鱗翥瞰麗天飛日午而遂撫有乎天下自是坤占正

則乎

萱殿而宮史播聲於椒塗

三朝翼翼怡怡愉愉至今

皇帝以至孝治九有惟我

聖母德龐福蒼地符天休滂瀛若海運寵從若山哀蓋更

三萬年而不一聆睇而

聖母則左迓右召

天相其意若頤受而指投也今夫

聖德之盛篤生

聖人

至仁也輔廸

聖人爲神民主而治莫盛於斯時

至慈也恪事

天

祖而步禱乎法宮

至誠以恭也陛庭春溫而環海澤逮

至和以惠也嘗出

懿旨舉行親蠶之禮爲宮中則範

至勤以儉也

聖母之聖天下既聞矣謹以

皇帝聖孝所以上承

聖母之歡而爲自古帝王未嘗有者言之

天子深愛恻恻悅澤愷悌京師則

慈寧數駕別館則

壽康三至雞鳴日中貴爲

王者而佩服出行動乎色容此

皇帝之恒行昭融者也至於歲行四序令節吉辰元日

瞻暉陽暉正春

皇帝供

玉饌于長春之館頌大賚于同樂之園時則焯焯旭旭竄
嚳丹鸞曼衍大張是瞰火戲山高水長夏五延薰
滄溟沸流蓬島瑤臺簫鼓龍舟日菱荷香綠淨邈
迤夫容焯爍被乎禁水

皇帝則奉勺藥之和以進芳菲甘旨中秋金精灑鎔上
吐梧桐九日黃鳳下舞於焉侍

慈宮之宴言告瓊粒之膻膻冬奉

安輦入居

壽安初日瀛臺冰嬉是觀九彩儻聊十光班騰

皇太后喜

帝爲加餐此

皇帝之歲時侍養泮奐盡歡者也若夫赤巖黃圖近或
數百南圻上苑射虎農隙湯泉煮砂沐浴赤日時
奉

聖母溫清孔吉或賦盤阜秀斲石骨萬年怪松飛瀑瓊滴
熱河環山避暑所宅大廚翠蒲翳薈蔥蒨搖風如
簞時乃秋獮稅于木蘭戴琚鹿素蒔綠鸞丹嬰鏃
薦豆遂充庖人

行殿上供

聖母饗殮其或周覽垓埏

警蹕四巡北則鬱鬱

陪京

祖

宗之原父老盤跚攀

金根軒西上清涼燻閭奧秘祝

釐祈年東躋岱宗萬物卉榮日觀蓬萊輪囷雲上氣迎長

生于是鼓紫鶴舞赤鶴

皇帝乃奉

聖母觀乎三江五湖之飛濤滌珠璧與錦綺下神光而天

璫玉浮石踞會稽上高

安輦所過草榮水泐若照玉燭而四和以調此

皇帝承

聖母意悅耳目而娛心志者也臣愚以爲是猶

聖壽六十以前所已有者冒海之所謳歌而柱史之所睹

記也

國家土宇販章鴻鈞龐厚南朔東西旣全而有惟天
以西峒暑積沙之外嗟峨層氷之間列幕重城或
後欵關倔強陋僻而仰不覲天自我

列聖定鼎以來數世而未賓矣往者

皇帝既以金川告功彰

聖母德尊上

檄號于時發策用鷹揚之勁過師越龍堆之隩先授尺組
牽厥大長以來遂收四衛拉特克有伊犁玉關
亭赭沫屬羈蹙蹙而天戈已磨乎哈薩克以
西自西而南諸部日回日布魯特以速喀什噶爾
若葉爾羌歐呀爬罕千百其歸厥版我隸厥田我
治冠帶威被糜麥大肥宅土中測暑正蓋地架而
天架

皇帝乃收金穰於一隅台萬方之玉食從容侍

瞻指顧西側曰自天所覆我稼我穡欲一怡

慈寧顏色焉策推重光十年以來開闢殊域遠越漢唐校

尉都護所治之部不知其幾萬億于時

徽號再加

聖母悅懌天下咸曰

聖人之養準乎四極此事甚盛雖唐虞未之聞懿哉非
人力也大功告成

聖母七旬

皇帝乃拔精鏤鏤寶契而上加乎

恭懿于時時也王母獻益地之圖老人昭德星之穢俘寶

玉于和闐贛天馬于宛地辟廡之槐千載攢榮外
囿之麇皓質闡瑞家家聰八世之矩矱人人覲百
歲之冠佩聿有國老

天潢之耆英王國之碩輔或匡衛殷鑠以環列或懸車
柴虎而偕侶元髯渥頰鶴視鴻舉綵繚而來覩者
凡二十有七人

皇帝詔圖之於秘府用祝

純嘏若其五都闕喧九堦鞅塏構屋則十洲環宮徵歌則
六鳳迭嘖瓊瓊與珊瑚錯落鸚鵡與麒麟羣類賓
連華平蓊蓊草木之葩萃軒都盧天嶠魚龍之戲

燭月恒與日升熾天符而地瑞自天之下思見王

會乃

御玉殿開

金闕鳳銜

詔而下來廣

慈寧之福康

皇帝遂詣

壽安稱

萬壽之觴

躬九成之舞諸王贊人相次左右節應律呂鏗鏘幡纒

荀河文集

卷一

三

愛日正午日祝

聖母與

天齊壽是歲也正月朔日娶女之次若璧合一燦燦五緯
水居牽牛木火躔危營室土金貫珠歲蕤蓋在元
枵嫩嘗之舍逆序以推而

聖母萬壽之辰實迎長日之至闕乎協哉

天示珍符照燭若是

皇帝曰都予其爲

聖母祝釐用敬答

天意焉

臣愚以爲惟

皇太后之壽

皇帝之孝上契

皇天應誠而效宜召太史迎日推策演一至萬以明貞元
之運兼帝王而同天地者憬然

今日而始見也

聖孝光哉

聖慈康哉

皇天示錫以嘉祥哉

蜀河文集卷一 終